



Тас түлеткен талант

Осындай атаумен ҚР суретшілер одағының мүшесі, «Құрмет» орденінің иегері Әбілбек Ұзақұлының кітабы жарыққа шықты.

Кітап тұсаукесері Арқалық қаласындағы Дала өлкесі тарихы облыстық мұражайында өтті. Хас шебердің еңбегі ұлықталып, есімі жаңғырған шараға ол кісінің ұрпақтары, мүсіншінің өзі туып – өскен Аманкелді ауданынан, қаламыздан, Нұрсұлтан қаласынан замандастары, көз көрген, сыйлас, замандас азаматтар қатысты.

Әбілбек Ұзақұлының 85 жылдығы қарсаңында «Тас түлеткен талант» кітабын құрастырған мұражайымыздың ғылыми қызметкері Батырлан САҒЫНТАЕВ болса, оның жарыққа шығуына шебердің Сапарбек Ұзақов бастаған балалары демеуші бол-

ды.

Бала күнінен сурет салуға бейім болған Әбілбек Ұзақұлы бойына біткен талантын біліммен ұштастырып, қазақтан шыққан тұңғыш мүсінші Хакімжан НАУРЫЗБАЕВТЫҢ себеп болуымен Алматыдағы Өнер училищесін мүсінші мамандығы бойынша тәмамдаған.

Әрі қарай өмірінің соңына дейін талмай еңбек етіп, халықтың көзқуанышына айналған талай мүсінді өмірге әкелді. Бүгінде қала әкімдігінің алдында тұрған Аманкелді Имановтың ескерткішінен бастап, Шақшақ Жәнібек, Жәуке, Кейкі батырлардың, Ахмет Байтұрсынновтың, Аманкелді ауданынан шыққан 15 Социалистік Еңбек Ерінің, қарымды қаламгер Ақан Нұрманов пен біртуар перзентіміз Төкен Елтебаевтың т.б. тұлғаларымыздың бейнесін тасқа қашап, қайталанбас туындыларын артына мұра етті.